

AKTA KERAJAAN TEMPATAN 1976

UNDANG – UNDANG KECIL PELESENAN ANJING (MAJLIS PERBANDARAN TAIPING) 1991

PADA menjalankan kuasa – kuasa yang diberi di bawah seksyen 73 Akta Kerajaan Tempatan, 1976, Majlis Perbandaran Taiping dengan ini membuat dan menurut seksyen 103 Pihak Berkuasa Negeri mengesahkan undang – undang kecil yang berikut:

1. Undang-undang kecil ini bolehlah dinamakan Undang-Undang Kecil Pelesenan Anjing (Majlis Perbandaran Taiping) 1991 dan hendaklah dipakai hanya bagi kawasan Majlis Perbandaran Taiping.
2. Dalam undang-undang kecil ini melainkan jika kandungan ayatnya menghendaki makna yang lain-

“dokter veterinar” ertinya doktor veterinar sebagaimana yang ditakrifkan dalam seksyen 2 Akta Doktor Veterinar 1974;

“lencana logam” ertinya lencana logam seperti yang tersebut dalam undang-undang kecil 4(2)(b);

“pemunya” berhubungan dengan anjing ertinya orang yang memiliki, menjaga atau mengawal anjing itu, tetapi jika sekiranya terdapat keraguan tentang keempunyaan seseekor anjing, pemunya atau penduduk premis yang sering didatangi oleh anjing itu atau seseorang yang biasanya memberi makan anjing itu hendaklah disifatkan sebagai pemunya sehingga dibuktikan sebaliknya oleh pemunya, penduduk atau orang itu;

“Yang Dipertua” ertinya Yang Dipertua, Majlis Perbandaran Taiping dan termasuklah Timbalan Yang Dipertua.

3. (1) Tiada seseorang boleh memiliki, menyimpan, melindungi atau menyenggara seseekor anjing yang telah mencapai umur tiga bulan melainkan jika ianya dilesenkan di bawah undang-undang kecil ini.

(2) Sesuatu lesen itu hendaklah habis tempoh pada 31hb Disember pada tahun lesen itu dikeluarkan.

4. (1) Sesuatu permohonan untuk mendapatkan suatu lesen hendaklah dibuat dalam boring sebagaimana yang diperuntukkan oleh Yang Dipertua dan hendaklah disertakan dengan fee untuk lesen sebanyak sepuluh ringgit.

(2) Selepas menerima sesuatu permohonan dan fee untuk lesen itu, pegawai pelesenan hendaklah-

- a) mendaftarkan anjing yang berkenaan dengan menyebabkan suatu catatan dibuat dalam daftar yang disimpan bagi maksud itu mengandungi perihal anjing dan nama serta alamat pemunya;
- b) mengeluarkan kepada pemunya anjing itu suatu lesen dalam bentuk lencana logam yang sesuai yang mempunyai nombor siri yang sama dengan nombor pendaftaran anjing itu; dan
- c) mengeluarkan kepada pemunya anjing itu suatu resit bagi fee yang dibayar, mengandungi perihal anjing dan mempunyai tandatangan pegawai pelesenan.

5. Jika terdapat pertukaran keempunyaan seseekor anjing yang berlesen, pemunya yang baru hendaklah, dalam tempoh sebulan dari itu, memberitahu pegawai pelesenan mengenai pertukaran itu; dan pegawai pelesenan itu hendaklah mendaftar nama serta alamat pemunya baru itu dengan percuma.

6. (1) Jika sesuatu lencana logam yang dikeluarkan di bawah undang-undang kecil ini hilang, pemunya boleh memohon kepada Yang Dipertua bagi suatu lencana logam yang baru dan Yang Dipertua selepas berpuas hati di atas kehilangan itu, boleh mengeluarkan suatu lencana logam yang baru apabila dibayar suatu fee sebanyak

lima ringgit dan lencana logam yang baru itu hendaklah mempunyai kuatkuasa sama seperti yang asal.

(2) Jika pada bila-bila masa selepas pengeluaran suatu lencana logam yang baru, lencana logam yang asal telah dijumpai pemunya hendaklah mengembalikan lencana logam yang asal itu kepada Yang Dipertua dan mana-mana pemunya yang gagal berbuat demikian adalah bersalah atas suatu kesalahan.

7. Pemunya anjing yang berlesen hendaklah mengadakan kolar anjing yang sesuai untuk dipakai oleh anjing itu, yang padanya lencana logam semasa hendaklah dipasang padanya dengan kukuh mengikut apa-apa cara supaya boleh dilihat apabila kolar itu dipakai oleh anjing itu.

8. Pemunya anjing hendaklah-

- (a) jika anjing itu berpenyakit, mengambil langkah seberapa segera yang boleh untuk membolehkan anjing itu diperiksa dan dirawat oleh seorang doktor veterinar dan tidak membiarkan anjing itu disimpan di premisnya melainkan jika anjing itu telah diperiksa di bawah rawatan seorang doktor veterinar;
- (b) menyenggara rumah anjing di mana anjing itu ditempatkan dalam keadaan cuci dan bersih;
- (c) membersihkan premisnya dari apa-apa bahan najis daripada anjing itu, dan berbuat demikian atau dengan apa-apa cara yang tidak mungkin akan menyebabkan kesalahan atau kesusahan kepada orang-orang lain;
- (d) mengambil langkah-langkah yang munasabah untuk memastikan bahawa anjing itu tidak menjadi satu gangguan kepada jiran-jirannya disebabkan oleh salakan yang tidak berhenti-henti atau selainnya;
- (e) mengambil langkah-langkah yang munasabah untuk memastikan bahawa anjing itu tidak merayau di luar kawasan premis pemunya dan bahawa anjing itu berikat apabila dibawa keluar dari premis pemunya.

9. (1) Mana-mana anjing yang berumur lebih daripada tiga bulan dijumpai lepas bebas atau dijumpai di tempat awam dengan tidak memakai lencana logam semasanya dan mana-mana anjing yang berpenyakit yang bukan di bawah rawatan

doktor veterinar boleh dibinasakan oleh mana-mana orang diberi kuasa bagi maksud itu oleh Yang Dipertua, dan mana-mana orang diberi kuasa sedemikian boleh pada bila-bila masa memasuki mana-mana tanah atau premis, selain daripada rumah tempat tinggal, bagi maksud mencari, mendapatkan, merampas atau membinasakan anjing itu.

(2) Mana-mana anjing, sama ada berlesen atau tidak, yang pemunya tidak ditemui, boleh dibinasakan atau selainnya dilupuskan dengan cara sebagaimana yang diarahkan oleh Yang Dipertua atau mana-mana orang yang diberi kuasa bagi maksud oleh Yang Dipertua.

10. (1) Pemunya harta yang mempunyai kawasan 929.51 meter persegi atau kurang tidak boleh menyimpan atau membenarkan disimpan lebih daripada dua ekor anjing di atas hartanya, dan jika kawasan itu lebih daripada 929.51 meter persegi, hadnya ialah empat ekor anjing melainkan jika selainnya diluluskan oleh Yang Dipertua dalam mana-mana kes tertentu.

(2) Tiada anjing boleh disimpan lebih tinggi daripada tingkat bawah mana-mana bangunan.

11. (1) Tiada seseorang boleh menggunakan mana-mana bangunan, premis atau pegangan untuk menyimpan anjing untuk pembiakan bagi maksud perdagangan atau sebagai rumah anjing veterinar atau klinik melainkan jika dilesenkan oleh Yang Dipertua bagi maksud itu.

(2) Suatu permohonan untuk mendapatkan lesen hendaklah dibuat dalam borang sebagaimana yang diperuntukkan oleh Yang Dipertua dan hendaklah disertakan dengan fee untuk lesen sebanyak seratus lima puluh ringgit.

12. Sesiapa yang melanggar mana-mana peruntukan undang-undang kecil ini adalah melakukan satu kesalahan dan apabila disabitkan boleh dikenakan denda tidak lebih daripada lima ratus ringgit atau dihukum penjara tidak lebih daripada enam bulan atau denda dan penjara kedua-duanya sekali.

Diperbuat pada 23hb April 1990.

[M.P. Tpg. A1/10/2/15, P.U. Pk. 23/75.]

DATO' ISMAIL BIN SHAH BODIN,
Yang Dipertua,
Majlis Perbandaran Taiping

Disahkan pada 21hb November 1990.

[PSUK Pk. (KT-Am) 30/14/2/1.]

MUHAMMAD FADZIL BIN KHALID,
Setiausaha,
Majlis Mesyuarat Kerajaan Perak